

Galasia

Teik pasi Pol hani teka kahikahi Jises Kraiss ti Galasia

Kakain ti haxewai teik pepa ie

Pol tel aposel tai teik pas ie hani teka kahikahi Kraiss ti texux xux Galasia sai 32 ahang muhin ti Jises moih aliawa ape Haeu waxi i hani tesol tonan. Kemuk Pol toto Galasia ape i kakaxi meng solian ti Jises Kraiss hani teka seilon ti tesol taon ie: Antiok, Ikonium, Listra ma Derbe. Ape kilan teka kumahe Ju laha sohot kahikahi Jises Kraiss. Imuh tesol ti teka Ju laha kum amuke waliko ti Pol hahanau. Laha lua hani Galasia ape laha ukek ka seilon usiwa nauna ti Moses ma hatesol saun ti teka Ju lehe Haeu namiloi ukek laha seilon sawisawin. Seilon teka laha soh ape laha usi tenen kakain puputa ien. Ti Pol hongoa, i tai teik pas ie hanau laha. I hanamena laha ka Haeu namiloi ukek laha seilon sawisawin kumahe nake ti usiai nauna ti Moses ma saun ti teka Ju tuahe na laha hana hatapo xoxoi namilolaha ti Jises Kraiss ma tin Holi Spirit kapiti laha.

¹ Teik pas ie tataiak nga Pol tel aposel. Kumahe seilon kilami nga aposel ma na seilon talo nga. Puki Jises Kraiss ma tel Tamak Haeu kilami nga ailei teik puasain ien, tetel i xahateni Jises ti matean. ² Nga ma hatesol teka akikikako ti Kraiss kapik, amite hakau amuam ti amite hani amuto teka kahikahi Jises Kraiss ti Galasia.

³ Amite kamei Haeu tel Tamakako ma Jises Kraiss tel Masiwi ti kako ti kola haniamuto lalape solialalu ma hatona hasoliai tiamuto. ⁴ Jises mat ti ukei kahi saun lialun ti kako lehe i awai kako ti saun ma namil lialun ti seilon ti aope ie. I onoteni hawane namili tel Tamakako

Haeu. ⁵ Kako lotu sameniwa Haeu lian tehue. Salan wanen.

Tenenawe meng solian ti Jises Kraiss

⁶ Ti lalape wawahen ti Kraiss ma soliaian, Haeu aile hasohotu amuto seilon tetan. Nga kum amemene wanen kiliwaian ka amuto talewen tehitomuto hani Haeu ape amuto hong soh kakain liai tenen ti meng solian ti Jises Kraiss. ⁷ Tuahe kakain ien kumahe wanen salan. Hina seilon laha hulo towiahu meng solian ti Jises Kraiss ape i hahataxina namilomuto.

⁸ Tenen meng solian ti Jises amite kaxi haniwen amuto se salan wanen. Aile ape kalak na tel ti amite ma na engel ti Haeu kaxi hani amuto meng liai tenen, amite kamei Haeu ti axi hawanean kawatan. ⁹ Nga kaxiwen ape nga kaxi ulea. Aoape amuto hong waxiwen meng solian ti Jises ti amite kaxi ahuti haniwen amuto. Na tel seilon kaxi hani amuto meng liai tenen, amite kamei Haeu ti axi hawanean kawatan.

¹⁰ Kumahe nga kakane amuto ukek lehe seilon amuke nga. Pahak wanen Haeu amukeak. Na nga tua ailele ti hamuamui seilon, nga kumahe unau Kraiss.

Sale Pol ti i sohot tel aposel

¹¹ Tesol akikimite ti Kraiss, pahak amuto tioiwa, tenen meng solian ti nga kaxi haniwen amuto kumahe seilon tua aile tanomi. ¹² Kumahe nga kema ti seilon ma na laha hanau nga. Jises Kraiss tetel i hatakei hani nga.

¹³ Amuto hongoen wouk ti imat, lokon ti nga ususi saun ti lotu ti teka Ju. Nga eliel hawane axiai kawatan hani teka kahikahi Jises Kraiss ma tohongi lalali ti halialu tamusukealaha. ¹⁴ Lokon ien nga xoini kilan teka lokok ti usiai saun ti lotu ti teka Ju ma tutuhak xoxoan ti usiai hatesol saun ti teka matahaun. ¹⁵ Tuahe Haeu hina puasain buah tetak. Hoi i kilamiwen nga lokon ti nga tai

takah. Kumahe i aile ukek ien nake ti soliai puasak tuahe ti lalape soliaian. ¹⁶ Ape i kola hatake hani nga tel Natun lehe nga kaxi tenen meng solian tetan hani teka kumahe Ju. Nga tai kamei paxai namili tel na seilon. ¹⁷ Tin nga tai lua hani Jerusalem ti paxaiai tesol lato tomu aposel imat tetak. Nga lua sawi hani texux xux Arabia. Ape muhin nga alia hani tehu taon Damaskas.

¹⁸ Muhi ahang toluhu tamusua, nga lua hani Jerusalem lehe nga kakak kapi Pita. Puasain huohu nga to kapin. ¹⁹ Nga tai paxai tesol aposel liai, mewenae Jeims tel ukale tel Masiwi Jises. ²⁰ Meng ti nga tatai ie se sawisawin. Haeu paxai tioi hawane ka kumahe nga puputa.

²¹ Imuh nga lua hani huoxux xux Siria ma Sailisia. ²² Lokon ien teka kahikahi Jises leili Judia, lato tai tioi nga. ²³ Lato tua hongohong meng ti seilon liai kakaxi, “Tetel seilon kemuk i to aile hahaliahu kako ma tohongi lalali haputai xoxoi namilokako ti Jises Krais, aoape ie i kakaxi meng solian tetan.” ²⁴ Ti lato hongoa waliko ti Haeu aile hani nga, lato lotu sameni i.

2

Tesol aposel amuke puase Pol

¹ Ahang huopanim hinalo tamusua nga lua alia hani Jerusalem. Nga ilowi hetekie Banabas ma Taitus kahitiak. ² Haeu hanamiloa nga ti lua hani ien. Ape ti nga Jerusalem nga kakak mewenae kapi teka masiwi ti ingi lotu ape nga nexi haxewa hani lato waliko ti nga kaxi hahani teka kumahe Ju sale meng solian ti Jises Krais. Nga watakai na puasak ti imat ma ti aoape ie i tua xoina. ³ Saka lato hong waheni kakaiak. Kalak Taitus, tetel kapik i tel Grik, lato tai hone lungei i ailei teik kikilam ti kotiai uli walikoun usiai saun ti teka Ju.

⁴ Tuae hina seilon ien laha woinakon kahikahi Jises Krai. Laha paxai otioti saun tetenen Jises Krai haniwen kako. Laha tohongi lali haputai xoxoi namil ti kako hina ka mewenae Jises Krai i awai kako ti kawatan ti lialui woukako. Tesol seilon ien pahalaha lungeakako ti aile usiai hatesol saun ma nauna ti lotu ti teka Ju. ⁵ Tuae amite tai hongeni namilolaha. Pahamite amuto soh tatalewa tenen meng solian ti Jises Krai ti amite kaxi ahuti haniwen amuto nake i salan wanen.

⁶ Tetesol masiwi ti ingi lotu ti Jerusalem lato tai hone lungei nga sohai waliko ti nga hahanau teka seilon. Lato pate seilon tuah tuahe kalak na lato seilon tuah ma na kumahe tuah, i kum sohi sale pupuwasak. Haeu kumahe i paxai wawaxi lape axe seilon ti i paxai kolongeni woulaha.

⁷ Tesol masiwi ien paxai tioi ka nga kikilamiai Haeu kaxiai meng solian ti Jises hani teka kumahe Ju, masin ti i kilami Pita kaxiai tenen meng ien hani teka Ju. ⁸ Ti pohe Haeu i aile Pita sohot tel aposel tetan ailei puasain leili teka Ju. Tin masin i hana nga tel aposel tetan ailei puasain leili teka kumahe Ju.

⁹ Jeims, Pita ma Jon, tesol masiwi tapein ti teka kahikahi Jises, lato paxai tioi ka Haeu hani nga teik puasain tuah ien. Lato teini minamili Banabas, kolakol ka amite ailele puasain tenenawe. Ape amite aile tenen namil masin, amili aile puasain ien leili teka kumahe Ju ape lato puas tatale kapi teka Ju. ¹⁰ Tin lato kamei amili hualiai teka kahikahi Jises laha tap soxi. Saun tenen ien hoi pahak wanen ailean.

Pol tumei Pita ti tehu taon Antiok

¹¹ Ti Pita lua hanima Antiok, nga tumei i ti puli teka seilon nake waliko ti i ailele kumahe wanen sawisawin.

¹² Imat Pita ang akakati teka kumahe Ju. Tuae ti tesol Ju kapi Jeims luama ape i kum lawai ma ang akati teka

kumahe Ju nake i mamata teka Ju namilo i halialu i. ¹³ Tin masin teka Ju liai laha aile usiusi saun tenen kumahe sawisawin ti Pita ailele. Ape laha itini hetekie taen Banabas.

¹⁴ Ti nga paxaiwa ka kumahe salan laha usiusi meng solian ti Jises, nga kakane hawane Pita ti pulalaha hatesol. Nga ukek, “O tel Ju, a o xaputiwen hina nauna ti kako teka Ju lokon ti o hukuma hetekie hani kapi teka kumahe Ju. Aile ape alahan o lungei teka kumahe Ju usiai saun ti kako teka Ju? ¹⁵ Kalu nakuama ti teka Ju ape kalu lap hetekiema saun ti teka Ju, kumahe masin teteka kumahe Ju laha kum usi kakai Haeu. ¹⁶ Tuahe kako teka Ju kahikahi Jises kako tioi ka seilon kum pon hasawiai wasolalaha kapi Haeu ti usiai nauna ti kako teka Ju, mewenae na namilolaha xoxoan ti Jises Krai. Aile ape kako soh hawane ti Jises Krai lehe Haeu namilo i ukek kako seilon sawisawin, kumahe nake kako usiusi nauna ti kako teka Ju tuahe nake namilokako xoxoan ti Jises Krai.

¹⁷ “Tesol ti teka Ju laha sokok kumahe kako usiusi kakai Haeu nake kako kum usi nauna ti kako teka Ju lehe wasolakako kapi Haeu i sawi. Na kako hana hatapo namilokako hani Krai lehe Haeu namilo i ukek kako seilon sawisawin, kaie Krai hanamiloa kako xaputiai nauna ti Haeu? Tap wanen! ¹⁸ Tuahe na nga usi aliakewen hatesol nauna ti kako teka Ju lehe Haeu namilo i ukek nga seilon sawisawin, ien salan nga ailele waliko ti ala nga kum aile. ¹⁹ Kemuk nga hahitake nauna ti kako teka Ju tuahe Jises Krai oxoxi nga ti hahitake tesol nauna ien lehe nga to hawane tel unau i Haeu. ²⁰ Ien masin ka nga mat ohoiwen Krai he kros. Kumahe ape nga usiusi wouk ti imat. Puki Krai pupuas leilok. Aope ie nga hana hatapo xoxoi namilok hani tel Nati Haeu, tetel i waheni hawane nga ape i mat ti ukei totonak. ²¹ Nga kum tale uke tehito k hani lalape solian ti Haeu. Ti wawahen tetan i awai

kako ti kawatan ti lialui woukako kumahe nake ti soliai puasakako. Na masin usiai nauna ti kako teka Ju i pon hasawiakako hani Haeu, Krai tua mat xoina.”

3

Usiai nauna ti teka Ju a namil xoxoan ti Krai?

¹ Amuto teka kahikahi Krai ti Galasia, amuto tap wanen patumuto. Nga kaxi haxewa hawane haniwen amuto sale matei Jises Krai he kros. Tuahe pate amuto hongeni ti seilon neini hakalala namilomuto. ² Nga kameimu amuto tetenen, amuto uke ukek ia Holi Spirit? Ti sale usiai nauna ma saun ti lotu ti kako teka Ju? Kumahe, Haeu hani amuto Holi Spirit nake amuto hong soh meng solian ti Jises Krai. ³ Amuto taxitaxiawen! Ti amuto hutui kahitai Krai, amuto hong usi Holi Spirit. Tuahe aope ie, amuto ailele ti puki kuimuto wanen. ⁴ Amuto kau hakilawen kawatan nake ti kahitai Krai. Lehe tesol kawatan ien tua xoina? Nga kum ukek! ⁵ Nga kakane ulea amuto, kumahe Haeu hani amuto Holi Spirit ma i aile kolakol tenen lalap wasolamuto nake amuto usi nauna ma saun ti lotu ti kako teka Ju, tuahe nake amuto soh meng solian ti Jises Krai ti amuto hongoen.

⁶ Namilo paxaiwa Abraham. “I soh hawane Haeu ape ti xoxoi namilon ien Haeu ukek i seilon sawisawin.” (*Gen 15:6*) ⁷ Aile ape amuto tioiwa ka nati Abraham wanen teteka seilon laha hina namil xoxoan ti Haeu. ⁸ Pepai Haeu hoi kak kilamiwen ka Haeu namilo ukek teka kumahe Ju laha seilon sawisawin na namilolaha xoxoan tetan. Hoi liai ti imat Haeu kaxi peleiwani hani Abraham tenen meng solian ti i ukek, “Nga aile hasolia hakila hani seilon ti lawe xux na laha soh hawane tetak hanowi o.” (*Gen 12:3*) ⁹ Aile ape teka laha hina namil xoxoan ti Haeu, i aile hasolia hani laha masin ti i aile haniwen Abraham.

¹⁰ Tuae teka laha haeliel usiai nauna ma saun ti lotu ti kako teka Ju lehe laha sohot seilon sawisawin, laha toto hahitake lengei Haeu. Masin ti pepai Haeu kakawen i ukek, “Tel na i kum aile usi hatapo lawe nauna ti Moses leili pepai Haeu, i hahitake lengei Haeu.” *(Deut 27:26)*

¹¹ Tap tel seilon pon usi hatapoi hatesol nauna ien. Tap tel seilon Haeu namilo i ukek i sawisawin nake ti usiai nauna ma saun ti lotu ti kako teka Ju. Masin ti pepai Haeu kakawen i ukek, “Tel seilon sawisawin i uke tonain kapi Haeu nake i hina namil xoxoan hani i.” *(Hab 2:4)* ¹² Usiai hatesol nauna ien i liai tenen wanen ti xoxoi namili seilon ti Haeu. Masin ti pepai Haeu kaxiwen, “Na tel pahan i uke tonain kapi Haeu nake ti usiai nauna ti Moses, i usi hatapo hawanemua hatesol nauna ien.” *(Lev 18:5)*

¹³ Jises Krai oxoxi kako ti lengei Haeu. I uke totonakako ape puki i kau kawatan ien. Masin ti pepai Haeu kakawen, “Tel na laha tahi hakea telei hani he pata, i hahitake lengei Haeu.” *(Deut 21:23)* ¹⁴ Aile ape nake ti pupuase Jises Krai, Haeu aile hasolia hani teka kumahe Ju masin ti i aile haniwen Abraham. Jises mat ukei totonakako lehe na kako hina namil xoxoan hani i, kako uke Holi Spirit ti Haeu kakawen i hani kako.

Nauna ti Moses kum xaputi tenen namil ti Haeu xinoti haniwen Abraham

¹⁵ Tesol akikik ti Krai, haxewaiamuto nga kaxi hani amuto tenen saun ti kaha seilon. Na masin hua seilon lalu xinoti tenen namil wasolalalu, tap tel i pon xaputian ma na sohian. ¹⁶ Tin masin ti Haeu xinoti tenen namil hani Abraham. I kakane Abraham ka i aile hasolia hani i ma tel i nakuama tetan. Haeu kumahe i kakak seilon kilan, i kakak seilon telawe, namilon i kakak Krai. ¹⁷ Salangawe kakaiak masin, Haeu xinotimu tenen namil hani Abraham imat. Aile ape tesol nauna ti i hani Moses haniakako teka Ju 430 ahang imuh, i kum pon xaxaweniai tetenen namili

Haeu. Aile ape nauna ti Moses i kum pon xaputiai waliko ti hoi Haeu kakanewen Abraham. ¹⁸ Haeu aile hasolia hani Abraham nake i kakawen i aile. Tin masin i aile hasolia hani seilon, kumahe nake laha usiusi nauna ti Moses tuahe nake hoi i xinotiwen kakain kapi Abraham.

¹⁹ Na masin ien, lehe nauna ti Moses ailei la? Haeu hani kako nake kaha seilon to ailele saun lialun. Tesol nauna ien kola haxewa hani seilon lialui woulaha. I puas atengi tataen ti Kraiss, tel seilon i nakuama ti Abraham, tetel ti Haeu aile hasolia hani i nake i xinotiwen kakain kapi Abraham. Tesol nauna ien Haeu hani teka engel haniai Moses, tetel wasole seilon ma Haeu. ²⁰ Kako tioi na masin hua seilon lalu xinoti tenen namil, lalu uke tel seilon to wasolalalu. Tuahe Haeu, mewenae i xinoti tenen namil hani Abraham, tap tel seilon toen wasolalalu.

²¹ Ti Haeu hani Moses tesol nauna ien kaie i xaputi kakain ti i xinotiwen kapi Abraham? Kumahe! Na masin ti usiai nauna ien i pon haniakaha tonain kapi Haeu, kaien ti usiai tesol nauna ien i pon hasawiai wasolakaha ma Haeu. ²² Tuahe ti he pepai Haeu i ukek ka hatesol seilon laha unau saun lialun. Aile ape seilon uke tonain kapi Haeu ti tap tahi tapoan na laha hana xoxoi namilolaha hani Jises Kraiss.

²³ Imat ti Haeu hani kako Kraiss, kako hahitake tesol nauna ien masin tel seilon leili kalabus i hahitake tel penenian. Tuahe Haeu kola hani kako aweisal ti oxoxiakako na kako hana hatapo xoxoi namilokako hani Jises Kraiss.

Xoxoi namilokako ti Kraiss kako sohot nati Haeu

²⁴ Aile ape tesol nauna ien pupuas ti neiniakako hani Jises Kraiss lehe wasolakako hani Haeu i sawi na kako soh hawane ti Jises Kraiss. ²⁵ Aoape ie kako hana xoxoi namilokako hani Kraiss. Kako ape kumahe hahitake tesol nauna ien.

²⁶ Aile ape ti xoxoi namilomuto ti Jises Kraiss amuto hatesol sohot nati Haeu. ²⁷ Lokon ti amuto uke baptais

hahitake axe Krai, amuto hutui usiai woi Krai. Amuto usi saun tenen haun masin na tel seilon i puxui tehu puxux haun. ²⁸ Nake ti xoxoi namilokako ti Krai, kako pakata hawane hahitake Krai, kako masin ka seilon telawe. Aile ape tap tel i pamu tuah ti liai tel, Ju ma na kumahe Ju, wawan ma na hehin, unau seilon ma na kumahe. ²⁹ Na amuto seilon ti Krai, amuto salan wanen kahi nati Abraham ape amuto uke waliko ti Haeu kakawen i hani Abraham.

4

¹ Nga kaxi haxewa aheke hanimu amuto. Na tel seilon mat salili kilai soxian, ti teka natun kokol tutuen lato masin tuahe unauan kalak lato hoi tame tesol soxi ien. ² Lato tua hong usiusi tutuen tel ngahatialato atengi ngain tetehu tel tamalato kilamiwen ti lato hapuasa tesol soxi ien.

³ Kako tin masin. Imat ti Haeu hani kako Krai, kako unau nauna ma saun tenen ti teka seilon ti tehu pon ie usiusi. ⁴ Tuahe ti i meiwa tehu ngain Haeu kilamiwen, i taloma tel Natun i takahama ti tel hehin. I takahama tel Ju hahitake nauna ti Moses. ⁵ Haeu taloma i oxoxiakako, teteka hahitake tesol nauna ien, lehe kako sohot hawane nati Haeu. ⁶ Nake kako se natun, Haeu taloma Spirit ti tel Natun hani leilokako. Ape i hanamiloa kako lotu axaii Haeu “Tamamite.” ⁷ Amuto ape kumahe unau nauna ma saun tenen ti teka seilon ti tehu pon ie usiusi, amuto se nati Haeu wanen. Aile ape Haeu hani amuto lawe waliko ti i kakawen i hani teka natun.

Pol to nanamilo i teka Galasia

⁸ Ti imat, amuto kum nam waxi Haeu. Amuto hana hat-apo tupuamuto hani waliko tenen kumahe Haeu. ⁹ Tuahe aope ie amuto tiori Haeu. Pamu ewian na nga ukek Haeu tiori amuto. Aile ape kalahai lehe amuto usi aliake nauna ma saun ti lotu tenen i kum huali uke amuto? Pahamuto

sohot ulea unauualato? ¹⁰ Nakon amuto sokok ka amuto hamuamua Haeu ti amuto usi hatapo saun ti lotu tenen ti teka Ju usiusi leili ahang tehu tehu? ¹¹ Nga namilo i hakila hawane amuto. Nakon lehe puasain ti nga aile haniwen amuto i tua xoina?

¹² Tesol akikik ti Krai, nga kamei eliel amuto, oxoxiwa amuto ti hahitake nauna ma saun ti lotu ti teka Ju hanowiwa nga ti ape nga oxoxa hanowiwen amuto ti imat. Amuto tai hong watakai kakaiak lokon ti nga kapimuto. ¹³ Amuto nameni ka nga tinun ti uli nga kaxi ahutiwa meng solian ti Jises Krai hani amuto. ¹⁴ Lialui naxe tinuk i tohongi lali amuto ti hong watakaiai kakaiak ma paxai teheniak. Tuahe amuto tai aile. Amuto waxi auni nga hanowi ka nga tel engel ti Haeu ma na puki alia Jises Krai. ¹⁵ Hatesol amuam ti amuto ien ape ia? Nga soh hawane ka ti lalape wawahen ti amuto tetak, ala amuto xaxusi hatasohu haniwen nga pulamuto na amuto pon. ¹⁶ Aoape ie ape lehe amuto watakai nga nake ti nga kakane amuto waliko salan?

¹⁷ Tesol seilon ti hakalalai meng solian ti Jises, laha puas eliel itiniai namilomuto. Tuahe kumahe laha ailele ti solian ti amuto. Pahalaha amuto siawa tetak lehe amuto hong usi nonoa laha. ¹⁸ Solian na amuto hong usi hawane seilon tuahe mewenae na kakai alaha sawisawin. Kakain sawisawin tetak amuto usiwa lawe ngain, kumahe mewenae na nga kapimuto.

¹⁹ Tesol natuk, lalape kawatan he tiak masin wanen moloi takahe akaik. Kawatan ien i kum tapo atengi tataen amuto sohot hanowi hawane Jises Krai. ²⁰ Pahak wanen nga kapimuto aoape ie lehe nga tioi aluini sale kakane amuto. Nga kum tioi hawane ape nga hanau ukek ia amuto?

Hua nati Abraham

²¹ Amuto teka pahamuto to hahitake nauna ti Moses, kaxi hanima nga, kaie amuto xeu hawane salangawe tesol nauna ien? ²² Pepai Haeu kakaxi ka Abraham natun wawan hua. Haga tel unau tel axoan hatakaha tel ape Sara tel axoan i kumahe unau seilon, i hatakaha tel liai. ²³ Ismael, tel nati Haga, i takah usiwa tuahe isiai namili seilon a Aisak, tel nati Sara, i takah usiwa namili Haeu ti i kakanewen Abraham.

²⁴ Nga kak kolongeni huhua hehin ien hani tenen waliko liai. Haga i tu kikilami kakain ti Haeu xinotiwon kapi teka Ju ti Maunt Sainai. Akaik ti nakuama ti Haga hoi laha sohot unau seilon. Tin masin teka Ju laha sohot hanowi unau tesol nauna ti Haeu hani Moses hanialaha ti Maunt Sainai. ²⁵ Aile ape Haga tu kikilami Maunt Sainai leili Arabia ma tin i tu kikilami teka seilon ti Jerusalem ti aope ie nake laha hahitake nauna ti Moses masin ka unau tesol nauna ien. ²⁶ Tuahe Sara i kumahe unau seilon, i tu kikilami teka ti Jerusalem haun. I masin tinakako teka kako soh ti Jises Krais. Akaik ti nakuama ti Sara, laha kumahe unau seilon. Tin masin teka laha soh ti Jises Krais laha kumahe unau tesol nauna ien. ²⁷ Masin ti Aisaia tel kuluiai kakai Haeu kakawen, i ukek,

“Tel hehin lieheh, amuamua.

Pak amuamua kalak o tai pet akaik.

O tel ti imat o kum tan akaik
tuahe aope ie kilai natum
i xoini nati teka hehin liai.”

(Isa 54:1)

²⁸ Tesol akikik ti Krais, amuto masin Aisak. Ati amuto takah usima kakain ti Haeu xixinoti kapi Abraham. ²⁹ Tuahe Ismael tel i takah usiwa isiai namili seilon, i axi kawatan hani Aisak tel i takah ti pohe Holi Spirit. Tin masin aope ie, teka laha unau nauna ti Moses, laha axi kawatan hani teka laha hana hatapo xoxoi namilolaha hani Krais.

³⁰ Tuahe teik kakain ti leili pepai Haeu i ukek, “Usi xaxaweniwa tel hehin unau seilon ma tel natun nake tel natun tap wanen i po uke waliko ti tel taman, ukean tetel akaik tinan kumahe unau seilon.” *(Gen 21:10)*

³¹ Tesol akikik ti Kraiss, aile ape kako kumahe kahi nati tel hehin unau seilon, teteka hahitake nauna ti Moses masin ka unau tesol nauna ien. Kako kahi nati tel hehin kumahe unau seilon. Kako hana hahatapo xoxoi namilokako hani Jises Kraiss.

5

Kraiss oxoxiwen kako ti hahitake nauna ti Moses

¹ Jises Kraiss oxoxiwen kako ti hahitake nauna ti Moses. Aile ape akeni kongini tatalewa xoxoi namilomuto ti Kraiss, kum ailele ka amuto sohot ulea unau tesol nauna ien.

² Amuto hongoa. Nga Pol kakane amuto, na amuto sowini hani laha aile haniamuto teik kikilam ti kotiai uli walikoumuto usiai saun ti teka Ju, kaien puase Kraiss hani amuto i tua xoina. ³ Nga kakane hakui ulea amuto tel tel, na amuto sowini hani laha aile hani amuto saun tenen ien, ala amuto aile usi hatapoen hatesol nauna ma saun ti lotu ti teka Ju. ⁴ Amuto teteka amuto usi usi nauna ti Moses ti hasawiai wasolamuto ma Haeu, amuto selai xaxaweniwen amuto ti Kraiss. Amuto talewen tehitomuto hani lalape soliai Haeu ti awaiamuto ti kawatan ti lialui woumuto.

⁵ Tuahe teteka kako hani Holi Spirit kapitiakako, kako mon hahawane ka wasolakako ma Haeu i sawi na kako hana hatapo xoxoi namilokako hani Jises Kraiss. ⁶ Haeu kum namiloi ukek ka seilon sawisawin na laha usi tetenen saun ti kikilam ti kotiai uli walikoulaha ma na kumahe. Waliko lalap ti Haeu na seilon soh hawane ti Kraiss ma kola xoxoi namilolaha ien ti saun ti wawahen.

⁷ Puasamuto ala pate solian. Aita hahakongu amuto ti usiai kakain salan? ⁸ Kum ukekek ka Haeu, nake i pahan amuto hamalumua oxoxain ti hahitake nauna ma saun ti

lotu ti teka Ju. ⁹ Kalak seilon tel, i pon pulutiai kilan seilon masin teik kokole ist seilon hana leili palawa i haxiwa palawa hateik. ¹⁰ Tuaehe nake ati kako kahikahi Jises Kraiss, nga soh ka amuto kum usi kakain tenen ti kumahe nga hahanau amuto. Haeu axi kawatan hani tuahe tel na seilon kakaian i hahataxina amuto.

¹¹ Tesol akikik ti Kraiss, teka laha ukek ka nga hone seilon usiai saun ti kikilam ti kotiai uli walikoulaha. Na masin salan, teka Ju tai aile halialu nga tuahe laha aile hahialalu nga nake nga kaxi haxewa salangawe matei Jises Kraiss he kross. ¹² Teteka Ju laha lungei hahataxina amuto ti ailei saun tenen ien, laha koti xaxawenimua walikoulaha.

¹³ Tesol akikik ti Kraiss, Haeu pahan amuto hamalumua oxoxain ti hahitake nauna ti Moses. Tuaehe kumahe ka amuto oxoxain lehe amuto tua aile saun lialun. Amuto he huhualawa lehe i kola ka amuto ailele saun ti wawahen. ¹⁴ Tenen nauna ti wahenai seilon liai hanowi ti kaha waheni aliake puki kaha, i salangawe hatesol nauna ti Haeu. ¹⁵ Tuaehe na amuto hanowi sinen tenen tumun kalimen, amuto he hilehil ma hamange aliliake amuto, lepetawa uke amuto halialu tamusuke amuto.

Kewa Holi Spirit neiniakako

¹⁶ Nga kakane amuto, usiwa aweisal ti Holi Spirit neneini amuto lehe amuto kum usi isiai pahamuto ti ailei saun lialun. ¹⁷ Isiai pahakaha ti ailei saun lialun i pahoxai waliko ti Holi Spirit pahan kaha ailewa. Namili Holi Spirit i kum onoteni wanen namilokaha ti ailei waliko tenen lialun. Mewenae lalu hil, lalu kum he paho. Aile ape kumahe ka lawe kaha aile waliko ti pahakaha. ¹⁸ Tuaehe na Holi Spirit neini amuto, nauna ti Moses kumahe ape i kakalauhi amuto.

¹⁹ Na kaha usi isiai pahakaha ti ailei waliko tenen lialun, kaha aile kilan saun lialun. Kaha aile saun lialun ti wawan hehin, sale sikisiki ti kaha pate hienain wanen ma kaha

kum kongini uke isiai namilokaha ti sik. ²⁰ Kaha lotui waliko tenen kumahe Haeu. Kaha hina apekaha ti hiliai seilon. Kaha wataikai teka liai ma kaha seilon tenen weli hilehil. Kaha lohaini teka liai. Kaha lengeini halialu seilon. Kaha lawe halepean. Kaha aile axi wasole seilon ma hukuma hani mewenae kapi teka namilolaha onoteni kaha. ²¹ Lawe kaha un taxitaxia ape kaha amuke ailei saun tenen tenen ti pate lialun. Tin kaha aile saun lialun liai masin tesol ien. Nga kakane hawane amuto masin ti nga honewen amuto imat, teka seilon laha to ailele tesol saun ien, Haeu kum hani laha waliko ti i apeseni haniwen teka natun ma tin laha kum uke tonain kapin.

²² Tuahe na Holi Spirit kakapiti kaha seilon, kaha aile kilan saun solian. Kaha waheni Haeu ma seilon liai. Kaha hina amuam leili tiakaha. Lawe kaha eliel hasawiai wasole seilon. Ailan lengeakaha ma kaha kum aile lioi puasakaha kalak kawatan tunahi kaha. Lawe kaha huali seilon liai ma aile hasolia hani laha. Seilon liai hina namil xoxoan ti kaha. ²³ Lawe kaha aile aluini hani seilon liai ma kaha waxaini tahiai isiai pahakaha ti ailei saun lialun. Na seilon usi tesol saun ien, tap tenen nauna i po tieni halialu laha.

²⁴ Teteka kako hana hatapoen kako hani Jises Kraiss, kako talewen tehitokako hani saun lialun. Ien masin ka isiai pahakako ti ailei saun lialun i mat ohoiwen Kraiss he kros. ²⁵ Aile ape na Holi Spirit kakapiti kako, hani tatalewa i neiniakako. ²⁶ Kako kum hanasanas, kum hahafele seilon liai ma kako kum namiloi wawataikai laha na laha xoini kako ti tuahe na tenen.

6

Kako ailewa saun solian

¹ Tesol akikik ti Kraiss, na tel seilon ti leilomuto i aile tenen na saun lialun, amuto teteka amuto tu xoxox ti usiai aweisali Haeu, hasawi aka matainiwa i. Tuahe lepetawa uke puki amuto put ti saun lialun. ² Amuto he huhualawa

ti kaui kawatan. Aweisal tewau ien amuto usi hahawane nauna ti Moses nake amuto aile usi saun tenen Krai pahan. ³ Na tel ti amuto namilo i ukek i seilon pate tuahe i kumahe wanen masin ien, i puluti aliliake i.

⁴ Kum paxai kokolongeni amuto hani seilon liai. Paxai aliakewa puki woumuto lehe amuto amuke waliko solian ti amuto ailewen. ⁵ Amuto tel tel aile aluini hawanewa puki puasamuto.

⁶ Teka laha kaxi hahanau amuto sale puase Krai, amuto hualiwa laha waliko solian ti amuto hina.

⁷ Kum puluti aliliake amuto. Tap tel i halokeni tohongi uke Haeu. Waliko ti amuto aile, amuto uke hapoponowi kahun. ⁸ Na amuto usi isiai pahamuto ti ailei saun lialun, kahun amuto uke pate lialun. Na amuto aile usi aweisal ti Holi Spirit kapiti amuto, amuto uke tonain kapi Haeu ti tap tahi tapoan. ⁹ Kako kum nuunuxa ti ailei saun solian. Na kako kum aile lioi, Haeu kahui hasolia kako tetehu taun ti i kilamiwen. ¹⁰ Aile ape na kako hina aweisal ti huhual, kako hualiwa lawe seilon. Tuahe kako huali poloseniwa teka akikikako ti Krai.

Tiliai nauna ti Pol

¹¹ Kakain ti wexoan lalap ie puki tataiak nga Pol ti hakuiai nauna tetak.

¹² Teteka pahalaha teka Ju liai paxai amukewa laha, laha lungei amuto ti ailei saun ti kikilam ti kotiai uli walikoumuto. Laha aile ukek ien nake pahalaha saliniai kawatan ti teka Ju liai axi teteka laha hahanau seilon ka Jises Krai mat he kros ti awaiakaha ti kawatan ti lialui woukaha. ¹³ Teteka laha usi ailei saun tenen ien kumahe laha usi hahatapo lawe nauna ti Moses. Pahalaha amuto usiwa tenen saun ien lehe laha sameni aliakewa laha ti puli teka Ju liai ka amuto hong usiwen kakaialaha.

¹⁴ Tuahe ti puki nga, nga kum sameni tenen na waliko, mewenae ti Jises Krai tel Masiwi mat he kros ti ukei

totonakako. Nake ti tenen ien, nga aile lioiwen saun tenen teka laha kum soh ti Kraiss ailele. Aile ape laha kum namiloi waxi waliko ti nga ukek pate tuah. ¹⁵ Haeu kum namiloi ukek seilon sawisawin na laha usi tenen saun ti kikilam ti kotiai uli walikoulaha ma na kumahe. Waliko lalap ti Haeu, kaha sohot hawanewa seilon haun ti usian. ¹⁶ Teteka laha aile ukek ien, Haeu tahane ma huali laha ape i hatona hasolia tialaha. Teteka seilon ien laha salan seilon tetan wanen.

¹⁷ Tiliai kakaiak, seilon kum axiaxi ulea nga kawatan pake mongohe mahe naxon he tinuk i kola ka nga tel unau Jises wanen.

¹⁸ Tesol akikik ti Kraiss, nga kamei Jises Kraiss tel Masiwi ti kako ti aile hasolia hawane haniamoto. Salan wanen.

KAKAI HAEU

The New Testament in the Seimat language, The Ninigo Islands,
Manus Province, Papua New Guinea

Nupela Testamen long tok ples Seimat, Manus Provins, Niugini
copyright © 2012 Wycliffe Bible Translators, Inc.

Language: Seimat

Translation by: Wycliffe Bible Translators

This translation is made available to you under the terms of the Creative Commons
Attribution-Noncommercial-No Derivatives license 4.0.

You may share and redistribute this Bible translation or extracts from it in any format,
provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for
use with those Scriptures and documents. For other uses, please contact the respective
copyright owners.

2013-10-14

Updates

eBible.org

PDF generated using Haiola and XeLaTeX on 3 Jul 2018 from source files dated 14 Jun
2018

9fa179b2-dd20-5dbd-9745-1fb6d5f9b415